

# Revisiun da la lescha fiscala sut la marella critica

La fracziun cristiandemocratica e la fracziun socialdemocratica pretendan cleras correcturas tar la revisiun da la lescha da taglia

DA MARTIN CABALZAR

■ **L'emna proxima tracta il cussegl grond la revisiun da la lescha chantunala da taglia. Quella è daventada necessaria sunter che la nova lescha federala da taglia sin las interpresas è entrada en vigor. Tenor las emprimas reacziuns da las fracziuns èsi da quintar cun ina viva e dira debatta.** Ton la fracziun da la pcd sco la fracziun da la ps vegnan a pretender cleras correcturas tant tar il sboz da la regenza sco tar las propostas da la cumissiun predeliberanta. Ils socialdemocrats smanatschan schizunt cun in referendum sch'il cussegl grond avess da sancziunar las propostas da la cumissiun d'economia e taxas.

## La pcd è stada radunada a Glion

La fracziun da la pcd che vegn presidiada da Remo Cavegn (Razén) è stada radunada a Glion per preparar la sessiun d'avust che ha lieu l'emna proxima. Cun panziers ha ella prendi enconuschientscha che la predeliberaziun da la fatschenta en il ravugl da la cumissiun per economia e taxas è sviada totalmain. La maiorità da la cumissiun ha numnadain proponi – senza basegn – in pachet da distgargiar fiscalmain las interpresas che va lunsch sur la reduziun prevedida da la regenza. Ina tala sbassada da la taglia chaschunass tenor l'avis da la pcd mains entradas da 70 milliuns francs per il maun public. Abstrahà dals 24 milliuns che sa dattan gia or da la reduziun naziunala da finanzas, effectuevas la proposta da la cumissiun in manco d'entradas dad ulteriurs 50 milliuns. Tant per las vischnancas sco per la plaivs na saja in tal pachet betg supportabel. Quai tant pli ch'ellas na sajan betg vegnidas consultadas en chaussa.

Era per il tegnairchasa chantunal na sajan ils effects d'in tal pachet betg supportabels. Vegnessian las propostas acceptadas, vessia quai per consequenza



La revisiun da la lescha da taglia vegn a procurar l'emna proxima ina viva e dira debatta en il cussegl grond.

FOTO O. ITEM

che la regenza stuess puspe reactivar ses pachet da spargn che il cussegl grond ha gist retratg en connex cun il project da GR Flex. Da pitir pervi da tals conclus malponderads e finanzialmain nunresponsabels avessian allura – tenor la fracziun da la pcd – cunzunt las regions, la cultura ed ils projects socials.

La fracziun da la pcd dal cussegl grond pretendan perquai cleras correcturas, sinquai che la proposta saja la finala supportabla per il chantun, per las vischnancas e per las plaivs. Per la pcd èsi giustifitgà che las interpresas vegnan distgargiadas supplementarain cun deducziuns da taglia en il sectur da las boxas da patenta e tar investiziuns en la perscrutaziun ed en il svilup. Era duai la reduziun da l'imposiziun parziala da taglia sin participaziuns considerablas vegnir migliorada per aschia promover e fructifitgar las investiziuns. Da quai vegnian era diffe-

rentas interpresas pitschnas e mesanas a profiter, puntuescha la pcd. Tenor la pcd èsi era giustifitgà che las personas giuridicas vegnian distgargiadas, preferescha dentant da conceder deducziuns da taglia a las abitantas ed als abitants en in senn d'ina cumpensaziun sociala. Quai duai succeder entras ina deducziun pli auta tar las premias d'assicuranzas, per uschia mitigar las grevezas da las premias da las cassas da malsaus che creschan ad in crescer.

## La pcd pretenda correcturas

La fracziun da la pcd è cunscienta che gia l'execuziun da la lescha federala persula chaschuna al chantun mains entradas da rodund 24 milliuns, uschia che ulteriuras distgargias fiscalas a disfavur da chantun e vischnancas na dastgian betg surpassar 25 milliuns. Era stoppian las deducziuns privadas da las personas giuri-

dicas e da las personas naturalas star en ina proporziun commensurada, puntuescha il schef da fracziun Remo Cavegn.

Sin fundament da la lescha federala davart la taglia federala directa hajan ils chantuns l'obligaziun d'indemnizar commensuradamain las vischnancas. La realisaziun da questa obligaziun entras la regenza evotgeschi medemamain damondas. Tenor la proposta da la regenza duai la summa da 6,9 milliuns vegnir attribuida al fond per la gulivaziun da las resursas. Quai avessia per consequenza che era vischnancas che han naginas sperditas profitian da questas indemnsaziuns, entant che vischnancas che stoppian registrar las pli grondas sperditas na retschavivan nagut. Ina proposta semeglianta na saja betg cuntentaivla e na gidia betg a mitigar effizientamain las grevezas e sperditas colliadas cun questa revisiun.

## Socialdemocrats smanatschan cun il referendum

Era tar la fracziun socialdemocratica che è sa radunada dacurt sut l'egida dal schef da fracziun Conradin Caviezel (Cuira) en il Plantahof a Landquart n'è betg cuntenta cun las propostas fatgas. Quai dentant per auters motivs. Gia en il rom da la procedura da consultaziun avevan la ps fatg valair che il chantun possia sa lubir da conceder tscherts levgiaments da taglia per il stan mez e per personas cun pitschens salaris e gudogns. I na dastgia dentant betg chapitar che primarmain las interpresas las pli grondas vegnian distgargiadas, entant che la populaziun stoppia contribuir ina part adina pli gronda a la finanziaziun da las incumbensas dal chantun. Sch'il cussegl grond suondia las propostas da la cumissiun predeliberanta, vegnia quai a custar annualmain a chantun e vischnancas rodund 70 milliuns. En il sboz che la regenza ha tramess en consultaziun eran anc prevedi mains entradas da 32 milliuns annualmain per il chantun e las vischnancas. Enstagl dad esser conscienta da sia responsabladad finanziaza e da preschentar in pachet integral supportabel, haja la cumissiun produci in pachet che mainia inevitlamain en in fiasco che pretendia ladinamain d'instradar in nov pachet da spargn. «Quai è politicamain nunresponsabel, enstagl d'elavurar in cumpromiss an ins uss sin maisa ina proposta senza med e mesira», constatescha Caviezel. Il cussegl grond saja uss dumandà da curreger la revisiun fiscala preschentada. Cunzunt la reduziun massiva da la taglia sin gudogn e la reduziun da la taglia sin dividendas, da las qualas mo paucs possian profiter, effectueschian gronds deficits en ils tegnairchasa chantunal e communal. «La ps e prompta per il cumpromiss e na vegn betg ad insister sin pretensiuns maximalas. Encunter ina lescha da taglia tenor las propostas da la cumissiun d'economia e taxas vegness la ps dentant a reagar cun in referendum», concluda Caviezel.